

УДК 82.09=-512.19/-93

Яева А.М.

БЕКИР ЧОБАН-ЗАДЕНИНЬ БАЛАЛАР ИЧЮН ИДЖАДЫ АКЪКЪЫНДА

Аннотация. Макъалеле дюнъягъа танылгъан эдебиятынас-тюрколог, къырымтатар халкъынынъ белли шаири Бекир Чобан-заденинъ балалар ичюн яраткъан эсерлеринде яш несильге ахлякъ ве эстетик дуйгъуларынынъ ашлануву меселелери тедкъыкъ этиле.

Анаhtar сёзлер: Бекир Чобан-заде, ахлякъ, эстетика, тербие, бала эдебияты, къоранта, эйилик (яхшылыкъ), ватанперверлик, ана тили.

Яева А.М.

О ПРОИЗВЕДЕНИЯХ БЕКИРА ЧОБАН-ЗАДЕ, НАПИСАННЫХ ДЛЯ ДЕТЕЙ

Аннотация. В статье на примере произведений классика крымскотатарской литературы, всемирно-известного ученого, профессора-тюрколога Бекира Чобан-заде исследуются вопросы роли детской литературы в привитии этических и эстетических чувств подрастающему поколению.

Ключевые слова: Бекир Чобан-заде, этика, эстетика, воспитание, детская литература, семья, добро, патриотизм, родной язык.

Yayayeva A.M.

ABOUT THE COMPOSITIONS BY BEKIR CHOBAN-ZADE FOR CHILDREN

Summary. In the article on the example of works of classic Crimean Tatar literature, world-wide scientist, professor-turkologist Bekir Choban-zade, the questions of role of child's literature are probed in instilling of ethic and aesthetic senses to the younger generation.

Keywords: Bekir Choban-zade, ethic, aesthetic, education, child's literature, family, good, patriotism, the mother tongue.

Меселени кёюв. Яш окъуйыджыларнынъ этик (ахлякъ) ве эстетик дуйгъуларыны уяндывда балалар эдебиятынынъ эмиети гъает муимдир, чюнки о, рухий омюримизнинъ айры бир пытагъыдыр.

Макъаленинъ макъсады – бутюн дюнъягъа танылгъан эдебиятынас-тюрколог, къырымтатар халкънынъ белли шаири Бекир Чобан-заденинъ балалар ичюн яраткъан эсерлерининъ бедий хусусиетлери, инджеликлери, тербиевий эмиетини косьтермектир.

Эсас материалны беян этюв. Башкъа миллетлернинъ бала эдебиятынен бир сырада къырымтатар балалары ичюн меракълы эсерлер язгъан шаир ве языджылар бар эди. Асан Чергеев, Джемиль Кендже, Абдуреим Шейх-заде (Алтанълы), Ибраим Асанов киби шаирлеримиз бала эдебиятынынъ зенгиллештирилъмесине озьлерининъ дегерли исселерини кёштылар. Оларнынъ эсерлерини озь вакътында тафсилятлы талиль эткен Бекир Чобан-заде, балаларда эмоциональ тесир къалдыргъан, оларда энъ назик дуйгъуларны кёзгъагъан эсерлерни кыйметледи. Бекир Чобан-заденинъ озю де балаларгъа аджайип шиирлер

багъышлады. Онынъ юксек гъаели, зенгин мундериджели шиириети миллий дуйгъуларны акс этювнинъ нумюнесидир. Бекир Чобан-заденинъ 1917 сенеси яраткъан «Яз акъшамы, эв алдында», 1920 сенеси «Оны да корьген бу кедай», «Догъдым бир эвде», «Тувгъан тиль», «Анам», «Булутлар, булутлар» киби шиирлери акъкъында сёз юрьсетеркен, оларнынъ балалар ичюн насыл терен ве буюк эмиетли олгъаныны анълармыз.

«Яз акъшамы, эв алдында» шииринде койлюлер турмушундан яз акъшамы левхасы джанлана: кой азбары..., халкъ севген акъшамсефа, сармашыкъ киби чечеклер арасында тешельген килим, миндер... Эв ишлеринден энди бошагъан къоранта раатланмакъта. Сыгъырны сагъып кельген келин ве къайнана арасында субетте бу къорантада гузель муамеле укюм сюрсени корюнип тура. Буюклер кучюклерге пек мераметли ве дикъкъатлылар, оларны эглендирмеге ве зевкъландырмагъа тырышалар: курештирелер, ойнаталар, оларнен берабер озьлери де гузель раатланалар ве балаларгъа миллий анъанелерге, оюнларгъа меракъ ашлайлар. Севимли музыка алетлеринден бири – къавал – бес-белли чокъ чалынгъан, онынъ эзилери инсан юрегиндеки ислерни ачкъан, онъа теселли багъышлагъан. Балалыкътан къавал сеслери алтында осип кельгенлернинъ теэссуратлары зенгин олгъан.

Шаир шииринде джыллы омюр, кулюнчли вазиятлер ярата ве инсан эеджанны ойле къозгъай ки, о, озюни бу къорантанынъ азасы оларакъ сезе.

Бекир Чобан-заде балалыкъта Къарабий яйласынынъ этеклеринде бабасынен берабер чобанлыкъ япа, ешилъ отлу кенъ орюшлер, джылгъалар бою джайылып отлагъан къойларны къайтара, къыр устуне узанып ята, озенчикнинъ акъкъаныны динълей, баракъларнен, къушларнен чынълай. Осъмюр бала, Бекир Чобан-заде табиятны севе, айбетлей, юрегинде назик-назик дуйгъуларны асрай. Тувгъан юртундаки янъылыкъларгъа дуйгъуларыны «Оны да корьген бу кедай» адлы шииринде ифаде эте.

«Догъдым бир эвде» серлевалы шииринде Бекир Чобан-заде фукъаре яшагъан къорантанынъ ал-вазиедини окъуйдыгъыгъа языкъсынып, терен аджынып косътере.

«Оджагъы сёнюк», «тёпеси чамур», «отсыз къоранта», «юреги, бавуры куюк» – бойле сёз ибарелерни къулланып, шаир балаларнынъ агъыр шараитте омюр кечиргенлери акъкъында бильдире. Къоранта башы чаре тапып оламай, шашмалай. Оны тынчландырмакъ макъсадынен хаста яткъан ана икметли сёзлернен:

*Айтмачы олмайджакъ шейлерни, акъай,
Кимсенинъ къысметин къытмагъан Худай.
Азгъана эсимни джыйгъан сонъ, турсам,
Азгъана йип тапып керьямны къурсам,
Балагъа, озюме ашайджакъ чыкъар,
Тырышкъан къаяны, тавларны йыкъар!.. [1, с. 73].*

Аллагъа итаат этюв инсанда келеджекке эминлик догъура, оны рухтан тюшюрмей:

*Унутмам ят эльде гъарип олсам да,
Бинъ тюрю къайгъынен сарарып солсам да,
Ич пешман дегильмен шай тувгъаныма,
Бахтымда, омрюмде сой къувгъаныма... [2, с. 147].*

Шиирде нефрет толу сатырларда муэллиф аятий шараитлерге, ичтимаий къурумгъа къаршы терен наразылыкъ беслегенини ифаде эте:

*Ташлангъыз мени сиз, байлар, дюльберлер!
Кетейим, чобанлар мени беклерлер!.. – дей шаир шиирнинъ сонъунда.*

Бекир Чобан-заде шиирлеринде, олсун балалар ичюн я да буюклер ичюн озь ватанына буюк севги, халкъына бахтлы такъдир арз эте. Бунынъ ичюн улу шаир токътамайып ку-решке, бильги ёлуна тюшмеге чагъыра: бахтны, сербестликни о тек куреште эльде этмекни коре.

Онынъ Будапештте (1917 с.) язгъан «Такъдирге» адлы шииринде о, такъдирге, баш язысына бойсунып, аят зорлугъы огюнде баш эгип, куйып, агълап-сызлап юремекни ич де ляйыкъ корьмей:

Емин эттим, такъдир, сенмен чарпышмагъа,
Ольгенджек къолларыньа япышмагъа, – дей шаир [3, с. 39].

Бекир Чобан-заде классик шаир, эдебиятчы оларакъ дюньягъа ялынъыз озю яшагъан девирнинъ козюнен бакъмады. Онынъ эр бир ширий эсери тувгъан халкънынъ, инсанлыкънынъ келеджек несиллери ичюн хызмет этмеге яратылды.

Бутюн заманларда эр бир халкъ ичюн тувгъан тиль иле гъурурланмакъ, оны севмек, айбетлеп къорчаламакъ земаневий бир мевзудыр.

«Тувгъан тиль» шииринде Бекир Чобан-заде, дерсинъ, онынъ тувгъан тилине нисбетен япыладжакъ вахшийликлерни юрегинден кечирген. Шиирнинъ эр сатыры бу фикирни исбатлай ве джумлемизни тюшюнджеге далдыра, ана тилимизни огренмеге, темелли бильмеге чагъыра ве рухландыра.

О, бир кунъ ола, тувгъан тиль олюм джарынынъ учурымлы четине келеджегини корьген... «Бир буюк сырымсынъ, душманлар бильмей», – сёзлери фикирни исбатлай.

Эбет, тиль – буюк кучъ, оны ёкъ этмеси зор. Чюнки оны ташыгъан халкъ даа бар; инсан хавфлы вазиятке къалгъанда Алладан ярдым сорай ве озъ ана тилинде «Ана, аначыгъым, анам» – дей.

Бекир Чобан-заде озъ «Тувгъан тиль» шииринде ана тилимизнинъ кучю, ифаделиги, шаирнинъ юрегине балалыкътан синьген севимли татлы ана тили акъкъында яза. Ана тили инсаннынъ акъылы, ирадеси, гонъюли, темели, тамырыдыр...

*Къабримде мелеклер соргъу сораса,
Азраиль тилимни бинъ кере тораса,
«Озь тувгъан тилимде айт манъа», дермен,
Озь тувгъан тилимде джырлап олермен.
Гонъюмни къайгъылар кемирип тургъанда,
Халкъымны тынышсыз йылдызы оргъанда,
Тувгъан тиль баикъасы акълыма кельмей... [4, с. 16].*

Бу къызгъын сатырлар онынъ къалемининъ кескинлигини, озъ ана тилимизде пек акъынтылы, салмакълы язабильгенини, «челик мантыкъ» саиби олгъаныны исбатлай.

Бекир Чобан-заде яшавны бутюн барлыгъынен севген инсан.

«Туман», «Узакъ тавлар», «Булутлар, булутлар», «Къарангъы гедже», «Боран» киби шиирлерде, бир тарафтан, сёз усталыгъынен табият адиселерни тасвир эте, дигер тарафтан, олар терен фельсефий фикирлер ташыгъан эсерлердир.

Месея:

*Узакъ тавлар, уджсуз тавлар,
Сиз де мени ойлайсызмы?
Гизли-гизли джылайсызмы,
Узакъ тавлар, уджсуз тавлар?
... Сени корьсем къарт айдамакъ болур эдим,
Бу къаяда тез сарарып-солар эдим,
Бир кошеде эп дюньяны унутыр эдим,
Узакъ тавлар, уджсуз тавлар! [1, с. 68–69].*

Илим – инсаннынъ кемалыдыр. Буны пек яхшы анълагъан Бекир Чобан-заде яшларны бильги ёлуна чагъыра, къадын-къызларнынъ да бильги алмасыны къайгъыра.

1920 сенеси язылгъан «Бабама» шииринде исе:

*Согъушамыз джавларман,
Курешемиз тавларман,
Эсмачыкъны ташланъыз,
Окътмагъа башланъыз.
Имдат олуп джетишсин,
Бахтман о да чекишсин, бахтман о да чекишсин...
Бахт бек къави, дженъильмий,
Джалварамыз, эгильмий.
Эсмачыкъны ташланъыз,
Окътмагъа башланъыз... – дей шаир [3, с. 104].*

Ана образы Бекир Чобан-заденинъ шиирлеринде чокъ расткеле.

*«Булутлар, булутлар,
Къаерден келесиз?
Коюмден, анамдан
Не хабер билесиз? [1, с. 67].*

Я да 1915 сенеси Будапештте язылган «Анам» шиирни алайыкъ:

*Ятсы къыла, седжде эте гъарип анам.
Дува эте, окъуна, Къуран опе,
Къол котере, ялвара, козьаш тёке:
«Бекирим», – дей, арсланым, гонълюм, козюм!..
Тек бир къазнам, инджим бар – гъарип балам.
Онип - сыйнап остюрдим ай-неннимен,
Эм назардан сакъладым, эм козьлерден...»
Ана гонълю недайын назик бина,
Пек билесинъ, озъ баланъ олмаса да... [5, с. 93–94].*

Бу сатырларда Бекир Чобан-заденинъ инсанийлик чизгилери: анасына гъает терен севги, незакетлилик, буюк итирам айдын корюне.

Шаир, омюринде энъ кучюк шейлерде биле, ич бир шейге лякъайд, первасыз олмаз эди; о, озюне пек талапкъар эди. «Шиирнинъ руху, левхаларынынъ догърулыгъы, кескинлиги, теренлиги къуветиндендир, бир сёзле левха ве тасвирдедир. Тасвир янълыш демек, шиир эсас итибариле олюмге махкум демектир. Тасвирлери зайыф, бунарлы олган шиирлери ич бир мерифат, санъаткъарлыкъ, къафие, везин ве сонъ унутылып кетмектен къуртара бильмез» – бойле талапларны Бекир Чобан-заде шаир ве яызджылар огюне де къоя эди [4, с. 72].

Бойлеликнен, юкъарыда айтып кечильгени киби, Бекир Чобан-заденинъ балалар ичюн язган шиирлери оларнынъ рухий дуйгъуларыны инкишаф этювде зенгин материалдыр. Ватан, халкъперверлик, ана юрткъа, табияткъа севги мевзулары янъгыраган эсерлерни тек акъикый устаз ярата биле. Устаз. Бу сёзде терен мана бар. «Устаз коръмеген шегирт адам олмай» деген аталар сёзю бар. Бу ич бир вакъыт ольмейджек акъикъат, чюнки эр бир адам озю сечип алган зенааты боюнджа эльде эткен мувафакъиетини устазсыз тасавур этип оламай. Акъикый устаз ич бир вакъыт шегиртининъ къальбинден силинмез, унутылмаз. Бу сёзлер улу алим, аджайип шаиримиз Бекир Чобан-задеге аиттир.

КЪУЛЛАНЫЛГАН ЭДЕБИЯТ

1. Велиулаева А.В. Тувган эдебият: учебник для 6 кл. / А.В. Велиулаева, Г.Э. Муртазаева, Л.А. Алиева. – Симферополь: Крымское учебно-педагогическое гос. изд-ство, 1998. – 192 с.
2. Балич А. Тувган эдебият. IV–VII сыныфлар ичюн / А. Балич, Ю. Болат, Р. Фазыл. – Ташкент: Укитувчи, 1983. – 248 с.
3. Чобан-заде Б. Я воздвигну дворец! Стихотворения / Б. Чобан-заде. – Симферополь: Сонат, 2001. – 192 с.
4. Нагаев С. Медений инкыляп аскери. Весикъалы повесть / С. Нагаев // Йылдыз. – 1990. – № 6. – С. 50–80.
5. Дерменджи А. Эдебият хрестоматиясы / А. Дерменджи, А. Балич, Дж. Бекиров. – Ташкент: Укитувчи, 1971. – 432 с.